

## LABURRERAN

**LABek euskal presoek eskubideen aldeko aldarrikapen eta informazio kanpaina hasi du Iruñean**

LAB sindikatuko ehun lagun inguruk elkarretaratzea egin zuten Iruñeko Foruen Monumentuaren aitzinean, eta, hala, hasiera eman zioten euskal presoek eskubideen alde abiatu duten hilabeteetako kanpainari. Rafa Diez LABeko idazkari nagusiaren esanetan xedea, «presoen eskubideen alde herritarra sentsibilizatzea da, preso politikoari eskubide horiek etengabe urratzen zaizkiolako, espetxe politika gaiztoaren bidez». Aste-oro egingen dituzte kontzentrazioak, herrialdeka eta eskualdez eskualde. Horrez gain, mahai-inguruak eta hiltzaldiak emango dituzte. Horrekin batera, ekimenak bultzatuko dituzte ehun langile baino gehiago dituzten enpresetan. Hurrengo ostiralean Gipuzkoan dute hitzordua.

**Hamabi preso ohi entzuteagira sartu dira Bilbon, sakabanaketa politika salatzen**

Hamabi preso ohi Bilboko Entzutegi Probintziala hartu zuten atzo eguerdian, sakabanaketa politika salatzen. Bertan, paretetan orriak itsatsi zituzten. Orrietan, aske egon behar ko luketen 81 euskal preso baldintzapean aske uzteko aldarrikatzen zen. Horien artean Bilboko zazpi preso daude. Hileko azken ostegunetan entzutegiaren aurrean elkarretaratzeak egingo dituzte.

**Amaitu plataformak elkarretaratzea deitu du gaur Dueñasko kartzelan**

Amaitu plataformaren deialdiari jarraituz, gaur goizeko 11:30ean elkarretaratzea egingo da La Moralejako (Dueñas) kartzelan, Laudelino Iglesias GRAPOko preso askatzea eskatzeko. Iglesiasek gose greba hasi zuen abenduaren 1ean. Duela bi hilabete, berriz, 42 eguneko gose greba egin zuen. Kartzelara joango den autobusa goizeko 08:00etan irtengo da, Barakaldotik.

**Andoainen aurrezki kutxa bat erretzeaz akusaturiko gazte batentzat 16 urteko zigorra eskatu du fiskalak**

Fiskalak 16 urteko kartzela zigorra eskatu zuen atzo Carlos Garcia gaztearentzat, Andoainen 1997an aurrezki kutxa baten bulegoa erretzea leporaturik. Atzo amaitu zen epaiketaren, eta abokatuak absoluzioa eskatu zuen, eta akusatuaren kontrako froga bakarra lekuko baten deklarazioa dela argudiatu zuen. Lekukoak atzera bota zituen aurretik egindako deklarazioak. Gertakariak 1997ko abuztuaren 6an jazo ziren: lau kaputxadunek molotov koktelak bota zituzten bulegora. Epaiketan, gazteak ukatu egin zuen gertakarietan parte hartu zuela.

**Hiru 'demo' auzitaratu dituzte Pauen, Lapurtarren Biltzarren erregistroa ebasteagatik**

Hiru *demo* iragan ziren atzo Pauko auzitegitik. Leporatua zizaien Lapurtarren Biltzarren erregistroaren ebasketan parte hartzea. Hiru horiekin batera —Iñaki Etxeleku, Gorka Torre eta Xarlo Etxezaharreta hain zuzen—, hermeretzi dira auzi horretan inkulpatuak. Ez zaie, ordea, beste batzuei bezala, Pauera hurbiltzea debekatu.

**EUSKAL PRESOK. «Trukerako txanpon gisa» erabiltzea salatu dute**

# Frantzian dauden sei preso estraditatu eta beste bi kanporatuko dituzte aurki

## Senideek eta AABek mobilizazioetara deitu dute hurrengo egunetarako

Iñaki Uriarte | **BILBO**

Hurrengo egunetan Frantziako kartzeletan dagoen «preso talde bat» Espainiaratuko dutela salatu zuten atzo Senideek eta AABek. Estradizioaren zain daudenak Serafin Blanco, Santi Arrospide, Nagore Mujika, Carmen Gisasola, Jose Mari Dorronsoro eta Jose Felix Perez dira. Bestalde, polizia espainiarren esku jar ditzaketen beste bi Xabi Makazaga zarauztarra (urtarrilaren 11n) eta Monika Martinez larrabetzuarra dira.

Urriaren 27an Frantziak Espainiaratu eta ondoren aske geratu zen Igor Urrestarazuk gogoratu zuen estraditatu dituzten sei preso horiek zigorra beteta daukatela, eta haietako batzuek, gainera, aspalditik. Hala, «bahituta» dauzkatela salatu zuen. Urrestarazuk estradi-

zioak arbuiatu zituen, «eskaerak egiteko torturaz ateratako akusazioez baliatzen direlako».

Serafin Blancoren kasua nabarmendu zuen. 1999ko abuztuaren amaieran zigorra, baina Fresnesko espetxean dago oraindik, «Espainiako Estatuak estradizioa eskatu zuelako, zigorra betetzen zuten egunetan bertan». Talde armatuko kide izateagatik zigorra bete arren orain laguntza eman izana leporatzen diotela ohartarazi zuen.

Bestalde, estradiziorik gabe Espainiaratzen dituzten euskal presoak kanporatzea ere salatu zuen. Helegiteak aurkezteko ezintasuna eta Ipar Euskal Herrian eta Europako Batasunean bizitzeko ezintasuna gaitzetsi zituen.

Kanporatu edo estraditatu dituzten hainbat presoren senideak ere izan ziren prentsaurre-

koan, eta haietako batek, Nagore Mujikaren aitak, euren seme-alabak estatuen arteko «truke txanpoi gisa» erabiltzea salatu zuen.

**Mobilizatzeko deialdia**

Txema Olabarrieta kanporatu ohi eta AABetako ordezkariaren hitzetan, «kanporaketak geldiaraz daitezke, Felix Alberto Lopez de Lacalleren kasuan gertatu zen bezala». Ikuspegi horretatik, AABek dei egin diote gizarte osoari, hurrengo egunetan mobilizatzeko. Gaur eta bihar propaganda banatuko dute, astelehenean elkarretaratzea deitu dute eguerdian Frantziako kontsuletxeko atarian, kanporaketen kontra agertzeko. Asteartean, arratsaldeko 8etan, Senideen kontzentrazioa amaitutakoan, manifestazioa egingo dute Arriaga plazatik Frantziako kontsuletxeraino. Kanporaketa edo estradiziorik gertatzekotan, haien herrietan mobilizazioak egiteko deia zabaldu dute.

**BATASUNA. Lehenengoz azaldu dituzte ildoak Iparaldean**

BOB EDME

## Batasunaren txostenen aurkezpena Kanbon

Erredakzioa / **KANBO.** Ezker Abertzalearen barruan bultzatu den Batasuna prozesuaren bost ildoak aurkeztu zituzten atzo Ipar Euskal Herrian. Kanbon egindako bilkuran, ildo bakoitzeko ordezkari bana

izan zen: *Bat eginez* ildoan Arnaldo Otegi EHko bozeramaileak aurkeztu zuen; *Arragoa* ponentzia Joxe Iriarte *Bikila*-k aurkeztu zuen; *Aralar* Errapel Txokarro, *Piztu* Karmel Etxebarriak eta *Igitia* eta *Mailua* Joxean Egido *Takolo*-k. Batasuna prozesua Ipar Euskal Herriko abertzaleen artean zabaltzeko helburuarekin egin zen atzoko bilkura. Hego Euskal Herrian ere hainbat aurkezpen ekitaldi egin dira.

**MAHAINGURUA****Gaia:** «Aterabidea zain daukagu»

**Hizlariak:** - Joseba Egibar (EAJ)  
- Arnaldo Otegi (EH)  
- Gorka Knörr (EA)  
- Antton Karrera (IU-EB)

**Moderatzailea:** - Martxelo Otamendi**Eguna:** Abenduak 18, astelehena**Tokia:** Tolosako Leidor zinema**Ordua:** 20:00ak**Antolatzailea:**GALTZAUNDI  
EUSKARA TALDEA